

小學韻語

小學韻語

浙江書局刊本

叙

余道光戊申。課徒左氏芭蕉山房。日與諸生講
小學大學之方。諸生以朱子小學一編。為人生
必讀之書。惟語句長短。參差不齊。小兒初入學。
遽以此授之。往往不能以句。思欲有以便於讀
而不得。余因為之撮其大要。輯為韻語。復取古
人註疏。附於其下。令其隨讀隨解。諸生樂其誦

之易也。方欲鋟之木。而粵匪之禍起矣。自戊申
以來。迄今九年。一夫倡亂。禍延東南。天下絃誦
之聲。或幾乎熄。余以一介書生。倡提義旅。馳驅
於吳楚之間。而其一時同事者。及門之士居多。
共患難。一死生。履險蹈危。絕無顧惜。抑何不以
利害動其心耶。當天下無事之秋。士人率以文
辭相尚。有言及身心性命之學者。人或以為迂。

一日有變。昔之所謂迂者。奮欲起而匡之。救之。
是殆所謂其愚不可及者與。亦由其義理之說。
素明於中故也。余自愧德薄。不能以身教人。竊。
幸諸生克自奮發。不負其平日之所習。尤願其。
益相策勵。曰親當代崇實之儒。拔本塞源。共正。
天下之學術。學術正。則禍亂有不難削平者。非。
徒恃乎征戰已也。孟子曰。經正則庶民興。庶民。

興。斯無邪慝矣。此之謂耳。諸生軍務倥傯之餘。
尤日取此編相為叅訂。恐因亂而失也。付於攻
木氏。余因有感於當世之務。復慨乎其言之時。
咸豐丙辰正月朔。湘鄉羅澤南。叙於湖北洪山
營次。

小學韻語

湘鄉羅澤南著

及門諸子參訂

教人之道

首重發蒙

蒙以養正

是曰聖功

易曰。蒙以養正。聖功也。蒙昧也。人當幼時。蒙昧無知。發
開啟之也。蒙時養之以正道。即作聖之功也。

小學之功

大學之基

涵養德性

務習少儀

古者小學教人以威儀倫常之則。皆所以養其德性。為大學之本。人生當務之急也。○篇首言作聖之功。肇於蒙養。以見小學為入德之始基也。

音註

少去聲下同

人之初生

至善者性

仁義禮智

天之所命

命猶令也。性即理也。仁義禮智為人之性。是皆有生之初。天之所以命於人者。至善者也。

惻隱辭讓

羞惡是非

藹然四端

擴而充之

惻傷之切也。隱痛之深也。辭解使去己也。讓推以與人
也。羞恥己之不善也。惡憎人之不善也。是知其善而以
為是也。非知其惡而以為非也。藹然衆盛貌。端緒也。擴
推廣之意。充滿也。惻隱之心。仁之端。辭讓之心。禮之端。
羞惡之心。義之端。是非之心。智之端。四者皆人之情也。
性具於中。情緒自見於外。初發之時。其幾甚微。擴而充

之則性可盡矣

音註

惡去聲擴音廓

幼而不學

遂喪天真

性漓情乖

不可為人

喪失也。天真即天所命於我之性也。漓離也。乖戾也。性漓情乖失為入之道矣。

音註

漓音離喪去聲

父兄之教

當及其時

長其良能

充其良知

良知良能自然之知能也孩提知愛稍長知敬人各有此自然之德教之者因而充長之而已○以上言天命之原以明小學之教

音註

長上聲下同

因乎性之自然也

古人妊子

胎教有則

不聽淫聲

不視惡色

坐立不倚

邪味不嘗

如此生子

端正異常

妊孕也。胎教者。母當孕子之日。即有以教之也。蓋真精妙合之際。正形生神發之初。母之氣正。子之所受亦正。母之氣邪。子之所受亦邪。此自然之理也。列女傳曰。古者婦人孕子。寢不側。坐不邊。立不蹕。不食邪味。割不正不食。席不正不坐。目不視邪色。耳不聽淫聲。夜則令瞽誦詩道正事。如此則生子形容端正。才過人矣。

欲求乳母

須擇淑慎

所飼之子

類其性行

淑善也。飼乳其子也。司馬溫公曰。乳母不良。非音註。惟敗亂家法。兼令所飼之子。其性行亦類之也。

飼音寺
行去聲

更擇諸母

恭敬而慈

出入教導

為子之師

內則曰。凡生子。擇於諸母與可者。必求其寬裕慈惠。溫良恭敬。慎而寡言者。使為子師。諸母眾妾也。可者。非眾妾而可為子師者。

子能食食

教以右手

子能言語

唯俞不苟

食飯也。食用右手。取其強也。唯應之急也。俞應之緩也。男唯女俞。剛柔之義也。

音註

食上音石下音

寺唯上聲

俞音史

子稍有知

常示毋誑

孟母買肉

言期不妄

誑欺也。常示毋誑。教之以誠也。孟子幼時。問東家殺豬何為。母曰。欲啖爾。既而悔曰。吾聞古有胎教。今適有知。

而欺之。是教之以不信也。乃買豬肉以飼之。既長就學。遂成大儒。

音註 誑古况切

數與方名

六歲可知

男女異席

七歲別之

數自一至十至萬也。方名東西南北也。七歲男女不同席。示有別也。

遞至八歲

乃入小學

講習少儀

罔敢或錯

古者人生八歲。自王公以下。至於庶人之子弟。皆入小學。嫻習少儀。十有五歲。則自天子之元子。眾子。以至公卿大夫元士之適子。與凡民之俊秀。皆入大學。教以修己治人之道。○以上由未入小學之先言之。以見教之當豫也。

音註

遞音弟

小學之道

教之有方

敬爾威儀

飭爾倫常

威儀抑抑

是曰定命

彝倫攸叙

乃盡其性

威儀視聽言動飲食衣服之節也。倫常君臣父子夫婦昆弟朋友之道也。飭正也。抑抑密也。劉子曰：民受天地之中以生，所謂命也。是以有動作威儀之則，以定命也。彝常也。盡倫即所以盡性也。○敬威儀飭倫常二者乃一篇之綱領也。

音註

飭音敕

凡為弟子

夙夜儼恪

向晦宴息

日出而作